

Pensyarah muda hayati tamadun Jepun

Kuala Lumpur: Peluang mengikuti program pertukaran budaya dan akademik ke Jepun digunakan sebaik mungkin oleh 21 pensyarah daripada 15 universiti awam (UA) di negara ini untuk mempelajari serta melihat budaya negara Matahari Terbit itu melalui kaca mata ilmiah.

Program yang dikenali dengan nama Jenesys itu disertai pensyarah daripada Universiti Malaya (UM), Universiti Putra Malaysia (UPM), Universiti Kebangsaan Malaysia (UKM) dan Universiti Islam Antarabangsa Malaysia (UIAM).

Peserta program yang juga pensyarah kanan Jabatan Kejuruteraan Elektrik UM, Dr Mohamadariiff Othman, berkata program itu antara lain bertujuan untuk membina asas persahabatan dan kerjasama kukuh antara kedua-dua negara.

Beliau berkata, kunjungan itu juga dapat memperkukuhkan hubungan dari aspek akademik dan memberi gambaran sebe-

nar mengenai ekonomi, masyarakat, sistem politik serta dasar luar negara Jepun.

"Delegasi Malaysia juga diterapkan dengan pemahaman mengenai kehidupan sebenar warganegara Matahari Terbit itu, sehinggalah kepada sesi perkongsian tatacara rakyat Jepun yang disampaikan Profesor Emeritus, Akita Nakamura dari Universiti Meiji.

"Peserta turut diberi gambaran sebenar mengenai aspirasi dan konsep jati diri rakyat Jepun melalui upacara meminum teh hijau, lawatan ke parlimen, istana pemerintah silam serta kompleks penyelidikan," katanya.

Sisi kemanusiaan

Program tahunan ini yang sudah masuk tahun keempat dianjurkan Pusat Kerjasama Antarabangsa Jepun (JICE) dengan kerjasama Kementerian Pendidikan Tinggi (KPT).

Program itu memfokuskan penyertaannya kepada pensya-

rah muda berusia 35 tahun ke bawah dalam pengkhususan bidang sains dan teknologi daripada UA seluruh negara.

Melalui program itu, peserta berpeluang menjelajah beberapa bandar utama di Jepun termasuk Tokyo, Kobe, Osaka dan Hyogo.

Peserta turut dibawa ke pameran mengenai tragedi gempa bumi yang melanda bandar Kobe pada 1995 yang mengorbankan lebih 6,000 nyawa.

Mohamadariiff berkata, melalui pameran itu, terserlah sisi kemanusiaan rakyat Jepun yang sebenarnya tidak banyak berbeza dengan rakyat negara lain yang mahukan yang terbaik untuk negaranya dalam apa juga keadaan bencana menimpa.


"Pada penghujung program ini, peserta diminta membentangkan semua hasil dapatan yang diperoleh sepanjang mereka berada di Jepun dan membentangkan pelan perancangan masing-masing," katanya.

Peserta program ketika berada di pusat penyelidikan termaju Kompleks Spring-8.



info

→ Program ini memberi peluang kepada peserta untuk mengenali warga Jepun, terutama dari aspek budaya kerja yang berjaya membina tamadun bangsa itu sehingga dikagumi dunia.



Delegasi dari Malaysia mengabadikan kenangan di hadapan bangunan parlimen Jepun.